

Regional News Unit AIR Aizawl
Friday, July 26, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Chief Minister Pu Lalduhoma'n a kaihhruai sorkar chu lang tlang leh huapzo taka an kal zel tur thu MPF a hrilh.
- Ramchhunga damdawiin tha bik tehna, NQAS Certification chu Sialhawk PHC pek a ni .
- Union Minister of State for Skill Development and Entrepreneurship Jayant Chaudhary chuan nimin khan Model Skill Loan Scheme New Delhi-ah a hawng
- Zaninah Paris Olympic tan a ni dawn.

<><><>

CM

Chief Minister Pu Lalduhoma chuan a office-ah Mizoram Peoples' Forum hruiute nimin khan a kawm a. Sawrkar kal zel dan tur an thurawn te ngaihthlaksakin, a kaihhruai sawrkar chu mipuiten rilru thar pua an din anih angin, lang tlang leh huapzo taka an kal zel tur thu a lo hrilh.

Chief Minister chuan Sawrkar nitin kal dan uluk taka lo thlira, lo zirchiang a, tihdan tur tha zawk nia lang te sawiho hi a tangkai em em a ni, a ti a. State Project Monitoring Committee kal chhoh mek dan te, tun hnaia hnathawh chhia mediaa lo lang thenkhat thawktute chung a hma an lak dan te, tender thenkhata sawrkar thutlukna siam dan te, leiba chhawm an ngah avanga harsatna an tawh dan leh hma an lakzui dan te, central sawrkarin puk theih chin a siam chungah chauh sum puk an tum thu te, chumi atana inrenchemna lama hma an lakna te, tun hnaia special drawing facility hmanga ni 5 emaw vel chauh an puk belh chhan chu state sawrkar tana a hlawk zawkna a awm vang a ti an nih thu te, CBI chu ram dan tharin a phut ang thlapa General Consent pek an nih thu te a lo hrilhfiah a. Aikal pawh kan titawp dawn a, dan awmsa kan kengkawh ang. Chutiang bawkin Non Practicing Allowances pawh dan ang taka kal kan tum. Mipuiten rilru thar puin sawrkar thar an siam tawh a, huaisen takin, langtlang leh huapzo rorelna kalpui hi kan tum tlat a ni, tiin a lo hrilh.

MPF Gen Secy Rev. Lalramliana Pachuau chuan kum chanve chung lekin sawrkar hmalakna tha leh duhawm tak tak hmuh tur a tam avangin an lawm hle tih a sawi a. Tha taka ram inrelbawlina leh hmasawna a kal zel theih nan; an pawl thiltumin a sawi angin; MPF in a ngaih pawimawh thil te a hnena thlen an nih thu a tarlang. Hruaitu dangte pawhin thusawiin, media hmanga inbeihna a nasa a, mipuite kan phawklek fo ni tein kan hria. Sawrkar sawiselna tam tak hi chu thu taka ngaih tlak loh te, thu tling lutuk lo nasa taka han vawrh lar luih te an ni tih a hmuh theih a. Chutihrualin fimkhur lehzuala sawrkar a kal a tulna te pawh a awmin an hria a ti.

<><><>

FOCUS

Mizoram chung a Fostering Climate Resilient Upland Farming System in the North East (FOCUS) Project hnathawh dan thlir letna Brainstorming Session chu nimin khan Irrigation & Water Resources Department ah neih a ni a, session hian ni hnih chung a awh ang.

He hunah hian Focus Project hnuaiia kum 6 chhunga hnathawh hrang hrangte thlir hona neih niin, Mizoram chhunga kuthnathawktu chhungkua 48,900 chuangin hlawk zawka an hnathawh atanga hlawkna tam zawk an neih theihna tur leh, sik leh sa danglam zel mil a lo neih dan inzirtirna leh hnathawhte thlir hona neih a ni a, Project hnuaiia hmalakna tur hrang hrangte sawi ho a ni bawk.

Kum 2022 November thla khan Brainstorming session hi hlawhtling taka neih lo ni tawhin, kumin ah pawh Focus hnuaiia thawk Officer leh Staff 240 chuang an kalkhawm a ni.

<><><>

NQAS

Ramchhunga Hospital tha bik tehna, NQAS Certification chu Sialhawk Public Health Primary Centre (PHC) hnenah pek thar leh a ni a. Heti hian Mizoramah NQAS Certified facility 9 (pakua) a awm ta a ni.

Health Minister Pi Lalrinpuii chuan hetiang dinhmun thleng tura theihtawp chhuahtu thawktu zawng zawngte chung-ah lawmthu a sawi a. India ram-a damdawiin tha bik a thlanchhuah Mizoramin a neih belh zel chu Mizoram tan mellung pawimawh tak a nih thu sawiin thawktu zawng zawng te inpekna leh thawhho thatna te avangin lawmthu a sawi bawk a. Hetiang ang dinhmun luah ve thei tur hian midangte pawhin tan la thar zel se, chutih lai erawh chuan lawmman dawna atan mai ni lova, mahni hnathawhna theuhah taimak chhuah chhunzawm zel tur leh thawhho thatna te nunphung a bet tlat tur a tha thlah lova tanrual a pawimawh a ni a ti.

Sialhawk PHC-a thawktu zawng zawng, State Quality team, District quality team, leh Mizoram Health Systems Strengthening Project team te inpekna rah chhuah a fakawm a ti e bawk.

Damdawiin tha NQAS Certificate hmu tur hian hian District level, State level leh National Level atangin tehna hrang hrang paltrangin Sialhawk Primary Health Centre (PHC) hian zaa 79 a hmu a. Damdawiin tha tehna-ah hian tehfung hrang hrang 2000 chuang a awm a ni.

<><><>

IMMUNISATION

State Task Force for Immunisation (STFI) chu an Chairman Health & Family Welfare Secretary Pi Sangchin Chinzah hovin nimin khan MINECO ah an thukhawm a, Mizoram District hrang hranga hri danna pek kawnga hmalaknate leh programme hlawhtlinpui tawhnate tarlan niin thlirho a ni.

STFI meeting ah hian NHM Mission Director Dr. Eric Zomawia chuan Mizoram pumah Immunisation Programme hrang hrang kalpui mek dan a tarlan hnuah report ngaihthlak a ni a, zawhna leh chhanna hun hman nghal niin report petuten an sawifiah a.

Rampumah naupang kum 5 chin zingah a lo berah zaa 95 immunisation hlawhtlinpui a nih theih nan theihtawp chhuah mek a ni a. State, District leh Block level ah sorkar leh tlawmngai pawlte thawhona tha neih a pawimawhzia sawiin mipuite hnenah immunisation pawimawhna te hrilhhriat (awareness) lamah nasa lehzuala tanlak zel dan tur meeting ah sawiho a ni.

<><><>

SERCHHIP KVK

KVK Serchhip ten nimin khan N. Vanlaiphai ah 'PM 100 Days Programme on Diversification Programme on Oilseeds during Kharif 2024' pualin Badam chinna hmunah Field Day an hmang a

He Field Day an hi Badam chingtuten KVK mithiam te hmalak dan leh an hmalak meknaa thiamna inhrilhhriatna atan a hman a ni.

Dr. T. Vanlalngurzauva Senior Scientist & Head, KVK Serchhip in kalkhawmte hnenah Mizoram-in hriak lama tan lak a mamawh thu leh intodelh thei a nihna te, intodelh tura thlai chi thlan kawnga uluk a tul thu te sawiin a fuih a ni.

Kenny Zohmingliana, Subject Matter Specialist (Agronomy) chuan thlai hriak pai ah intodelh theihna kawng zau tak a awm thu tarlang in, Inkawmhona tawi hman anih hnu hian KVK Demonstration plot a badam chin enhona leh an hriat duh ang ang inhrilhna hunh man chhunzawm nghal a ni.

He hunah hian N. Vanlaiphai khuaa badam chingtu mi 30 vel an tel a, KVK Serchhip hmalakna hnuaiyah tunah hian khaw 6 ah badam ching mi 70 vel an awm mek a ni.

<><><>

MCCA

Mizoram Class IV Contractor Association (MCCA) chuan thuchhuah siamin an hna thawh theih chin tihpun a ni chu lawmawm a tih thu a sawi.

MCCA chuan Mizoram sawrkarin thla hmasa ni 26 – a thu a chhuahah Mizoram Class IV contractor ten cheng nuai 50 chauh hna an thawk thei thin chu, cheng nuai 250 hnathawk theia hlan kai an ni ta chu lawmawm an tih thu sawiin, Mizoram Chief Minister Pu Lalduhoma leh PWD Minister Pu Vanlalhlana ten theihtawp an chhuah puina zara a hlawhtlinna an hmu ta chu lawmawm an tih thu an sawi.

MCCA Gen.Headquarters chuan hun rei tak atanga an dam khawchhuah theihna tura tha leh zung an senga anlo beih tawh hnuaa a hlawhtlinna an hmu ta chu lawmawm an tih thu an sawi a ni.

<><><>

LAWNGTLAI FUEL DEALERS

Lawngtlai District Petroleum Dealers te chuan thuchhuah siamin an sumdawna ah harsatna an tawh nasat avangin karleh Thawhtanni atangin an harsatna leh buaina chinfel a nih hma chuan Tuialhthei lakluh chhunzawmluh nise an ti.

Thuchhuah an suam hnu hian Lawngtlai Addl Dc Pi B. Malsawmtluangi kaihuaiin, Sawrkar Official, NGO leh Kohhran aiawh bakah Lawngtlai District Petroleum Delaers- te thutkhawm hmanhmawh koh nghal a ni a,

Thutkhawmah hian Sawrkar official, NGO leh Kohhran aiawhte chuan Petroleum Dealers - te chu an thuchhuah sut turin an ngen a. Petroleum Dealers- te chuan an ngnenna zawhawm an tih rualin, All Mizoram Petroleum Delaers' Association hnuaiyah awm an nih angin, AMPEDA lamah thlena thutlukna an siam tur thu an sawi a. YLA ten petrol pump atanga petrol lak theih zat bituk siam tawh lo tura ngenna awm pawh lungruak taka pawm a ni. Petrol- la thinte zingah barrel -5 aia tam la turte chuan Deputy Commissioner's Office atangin permit lak zel ni se, permit nei motor- te chu CYLA duty ten dang loh nise an ti a. CYLA leh Petrol pump neitute pawhin a bik taka inkawmna lo nei se tiin an rel a ni.

Hetihlai hian, Sorkar tha tihchak nan Central YLA chuan Rakhine State a Tuialhthei leh leitha luttur chu khauh takin an la dang chhonzawmzel a, tunthla Ni 16 khan Lawngtlai District Magistrate chuan Lawngtlai District a Filling Station te zawmtur thupek chhuahin Tuialhthei a man bithliah aia sanga hralhchhuak lo turin a ti a, Myanmar leh ramdang ah sumdawna kaihnawih ah Tuialhthei pekchhuah a remti lova, Lawngtlai District chhungah dan lova Tuialhthei lei leh phurhluh a khap baw a, mamawh aia tam bur a dawh District Magistrate chuan remtilo baw.

Hetianga Tuialhthei khuahkhirhna District Magistrate in a chhuah hnuah District Magistrate thupek an zawm chung pawha tualchhung lama an mahni dawrtu engemaw zatin harsatna an tawh fo vangin Lawngtlai District a Filling Station te chuan Tuialhthei an hralhchhuahna ah harsatna an tawh phah nasa niin Filling Station enkawltu lam chuan an sawi a, an mahni dawrtute pawn harsatna an tawh fo vangte, an hotu lam atanga hun bithliah neia an hralhtur zat an ruahmansak angte pawh hralhchhuah theihloh palh mai hlauhthawnawm ah an din vangin an buaina leh harsatna tawh hi sutkian a nih hma chuan karleh Thawhtanni atang chuan Tuialhthei hi lakluh rihlo mai nise tiin thutlukna an siam ta a ni.

<><><>

MODEL SKILL LOAN

Union Minister of State for Skill Development and Entrepreneurship Jayant Chaudhary chuan nimin khan Model Skill Loan Scheme New Delhi-ah a hawng. He scheme hian a tum ber chu ramchhunga hnathawk thei thalaite tha tih chak a ni a. Zirna leh thiamthil lamah thalai sing 2 leh sang 5 chuang te tan tanpuina a pe dawn a ni.

Thusawiin Pu Chaudhary chuan he scheme hnuai loan amount tam zawng bituk chu tihpun niin ahmaa nuai 1.5 thin chu nuai 7.5 ah tihpun a ni a ti a. Union Finance Minister Nirmala Sitharamani'n Union Budget a phar tum pawh khan he scheme hi a sawilang a ni a ti baw.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zuiang. Tun tum ami hi episode 112-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>

PARIS OLYMPIC

Vawiinah Paris Olympic tan a ni dawn. Opening Ceremony hman anih hma atangin inelna thenkhat tan a ni a. Mimin khan mipa leh hmeichhe thalkah intihsiakah India aiawhte an inlan a. Mipa team leh hmeichhe team ten ranking round ah quarter final an thleng a. Tun thla ni 28 ah khelh chhonzawm a ni ang.

Paris Olympic hi zanin dar 11 ah hawna inkhawm ropui taka hman a ni ang

<><><>

VISA

Union Minister of State for External Affairs Kirti Vardhan Singh chuan ram 16-ten Indian passport nei tan visa a thlawnin an pe a ti. Rajya Sabha-a ziaka zawhna chhangin Pu Singh-a chuan Indian Passport nei tan ram 40 te chuan visa-on-arrival an pek lain ram 47 in e-visa an pe tawh a ti a. Sawrkar chuan Visa-free entry, visa-on-arrival leh e-visa pe thei ram ti pung tur hian theihtawp a chhuah thu a sawi a. Hetianga Visa-free entry pek chungchangah hian a thlengtu ram thuneihna anih thu a tarlang bawh a ni.,

